

**Malaysia Hanya Pilih FDI Berkualiti, Kata Najib
Bernama
23 Mei, 2012**

KUALA LUMPUR, 23 Mei (Bernama) -- Malaysia kini lebih memilih dalam memperoleh pelaburan langsung asing (FDI), dengan tumpuan diberikan ke atas pelaburan berkualiti yang akan memudahkan peralihan negara kepada ekonomi berpendapatan tinggi berdasarkan pertumbuhan yang dipacu produktiviti.

Perdana Menteri Datuk Seri Najib Tun Razak berkata FDI berkualiti yang diperlukan oleh kerajaan meliputi teknologi tinggi, teknologi hijau dan tenaga alternatif, serta industri berintesisifkan pengetahuan.

"Inilah antara jenis teknologi yang kami perlukan untuk membuat peralihan daripada ekonomi berpendapatan sederhana kepada negara berpendapatan tinggi," kata Najib dalam ucapannya pada Jamuan Gala Majlis Penasihat Perniagaan APEC di sini Rabu malam.

Ucapan Najib dibacakan oleh Timbalan Perdana Menteri Tan Sri Muhyiddin Yassin.

Turut hadir ialah Menteri Perdagangan Antarabangsa dan Industri Datuk Seri Mustapa Mohamed dan Timbalannya Datuk Mukhriz Tun Dr Mahathir.

Najib berkata selain FDI berkualiti, kerajaan juga mengguna pakai budaya berdaya saing dan inovasi.

"Bagi melakukan peralihan daripada negara membangun kepada negara maju, kita perlu mengubah cara kita berfikir dan cara kita membuat kerja.

"Mengubah cara kita melakukan kerja tidak sukar. Beritahu seseorang cara melakukan sesuatu atau berikannya perkakasan untuk menjayakannya dan beliau akan menyiapkannya. Namun mengetahui apa yang perlu dilakukan adalah lebih sukar.

"Ia memerlukan pemikiran selain memerlukan kita lebih kreatif dan inovatif," katanya.

Najib juga menggalakkan rakyat untuk membangunkan budaya berdaya saing, cara berfikir yang mengutamakan penambahbaikan berterusan.

"Jika kita tidak berusaha untuk menjadi lebih kompetitif, terutama dalam perniagaan, sukar untuk kita bersaing di peringkat antarabangsa sebagai sebuah negara," katanya.

Najib berkata Malaysia akan terus melibatkan diri dalam perjanjian-perjanjian perdagangan bebas bagi mengambil kesempatan terhadap peluang-peluang yang ditawarkan hasil globalisasi.

"Kami yakin terhadap perdagangan bebas dan pemansuhan halangan perlindungan.

"Kita sudah mengurangkan halangan tarif secara beransur-ansur dan memudahkan penyertaan asing dalam ekonomi kita.

"Kita meneruskan agenda ini di Asean dan menerusi perjanjian perdagangan bebas, kita sudah menandatangani perjanjian dengan pelbagai negara," katanya dan menambah, Malaysia menyambut baik pelabur dari negara APEC untuk melihat lebih mendalam

terhadap pelung-peluang pelaburan di Malaysia.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=668186>